

# Ina gasetta online – «fiss er insatge per ils Rumantschs»

Novitads puschlavinas en l'internet

DA CLAUDIA CADRUVI / ANR

■ «Il Bernina» è oz ina gasetta online cun var 2000 visitaders mintga di. Cumentà ha tut cun ina simpla plattafurma d'internet per ils Puschlavins.

Avant tschintg onns han sis amis tratg si la pagina [www.ilbernina.ch](http://www.ilbernina.ch). Els han vulì porscher ina nova moda da communicaziun als Puschlavins. «80 pertschient da la populaziun aveva il 2004 già internet», di Danilo Nussio, in dals iniziants. «Quai è stà ina buna basa da partenza.» En il fratemp è «Il Bernina» daventà ina gasetta online che porta mintga di duas u trais novitads, schizunt da Nadal e Bumaun. Nussio è daventà schefredactur e lavura, quintà las uras, bunamain 50 pertschient per la gasetta. El fa quai plitost per la paja da Dieu sco er ils auters voluntaris che s'engaschan per «Il Bernina». Auter na giessi gnanca, pertge la gasetta online surviva cun in budget annual da 90 000 francs.

## Qualitad per paucs daners

Malgrà il budget stgars guardia la redacziun da porscher texts e fotografias da qualitad, di Nussio. «Nus empruvain d'involvar schurnalists giuvens.» Tar la redacziun tutgan in student da schurnalisssem, ina praticanta che fa sia dissertaziun en il Puschlav, ma era profis che lavuran tar la SDA u tar Swissinfo. Ins ha scolà ils correspundents da las uniuns localas e quelas furneschian uss contribuziuns duvras davart lur occurrenz, di Nussio.



**Il motor da la gasetta-online è il schefredactur Danilo Nussio che fa era finanzas e marketing per «Il Bernina».**

FOTO S. BISCOLM

«Il Bernina» è organisà sco uniuin. «L'emprima sfida dals iniziants è stada dad esser independent», di Nussio. «Nus na levàn betg daners ni da la confederaziun, ni dal chantun ni da la Pro Grigioni Italiano.» La gasetta online viva d'intgins donaturs privats e da circa 500 persunas che pajan in abunament volontari da 70 francs. Ma la finanziaziun n'è betg garantida e Nussio giavischass cun il temp ina consolidaziun da las finanzas.

## La LR s'interessescha per il model

Ils 3 da fanadur po Nussio preschentar la

gasetta online a la Lia Rumantscha a Cuir. Anc autras organizaziuns han mussà interess per «Il Bernina». Nussio è persvadì che la gasetta online è in bun model per pliras regiuns. «Quai fiss ina buna schliaziun per ils Rumantschs, la Surselva u la Val Müstair.»

Il Grischun talian n'ha sa chapescha betg mo ina gasetta online, mabain er ina «palpabla», numnadamain «Il Grigione Italiano» che cumpara dapi il 1852. Igl è ina gasetta emnìla per la populaziun dal Puschlav e da la Bregaglia. Ella ha pli che 3000 abunents.